

17. nov. 2016

UKA2016/31

**Nukissiorfinni Innaallagissamut, imermut kiassarnermullu assigiimmik akeqartitsinerup atuutseqqilersinnaanerata kingunerisinnaasai aammalu malitsigisaasussanut sunniutaasussat misissoqqissaarnerat nalilersorneqarnerallu pillugit nalunaarusiamik UKA2017-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Immanuelson (Suka K. Frederiksen, Siumut))

Siullermik Siumumiit oqaatigissuarput siunnersuuteqartup Jens Immanuelsonip (Suka K. Frederiksenip) tunngavilersuutai matumuuna Nukissiornikkut innaallagissamut imermullu kiassarnermullu akigitinneqartut, maannakkut Kalaallit Nunaanni illoqarfinni nunaqarfinnilu assigiinngiiaartumik inissisimasut, aaqiivigineqarnissai sulissutigineqartariaqartoq. Aammalumi Naalakkersuisooqatigiinnermi isumaqatigiissummi anguniagassat ilaattut isumaqatigiisutaavoq.

Taamaammat, ilanngullugu, Nukissiuuteqarnermut Naalakkersuisup oqariartuutaa, nammaqatigiinneq nunatsinni annertunermik akitigut aqqissuusseqqinnikkut anguniarneqartariaqartoq, isumaqataalluinnarpugut Siumumiit.

Kalaallit Nunaat illoqarfiit nunaqarfiillu ilisimavarput imminnut ungasillutik inissisimasut, inuit nunatsinni najugallit ikittuinnannguuvugut.

Taamaammat nammaqatigiinneq annertuumik pisariaqarpoq. Inoqarfiit ilaat piniagassatigut aalisarnikkullu pilersuipput, inoqarfiit ilaat ilinniarsimasunik annertuumik sulisoqarnikkut pilersueqataallutik. Taamaammat tamatta Kalaallit Nunaanniittugut ikittunnguulluta nunarujussuarmi susassareqatigiippugut, tamannalu ilaatigut aamma Nukissiornikkut aqqissuusseqqinnermi malunnarnerusumik nammaqatigiinneq anguniartariaqarparput.

Taamaammat Siumumiit siunnersuut ilalernartipparput, inassutigalugulu akuersissutigineqarnissaa.

Qujanaq.

Jens-Erik Kirkegaard, Siumut.